

Et poi li fo mandato il presente, portato per Zuan Batista di Adriani Secretario dil Consejo di X et Alexandro Frizier, qual era zà dito orator montato in barca per Chioza, e lo trovono a Malamocho, e li dete il presente e lo acetoe con parole molto grate. El presente fo: prima, taze d'arzeno schiete numero 18 et lavorate numero 12, do bazilli d'arzeno belli et 8 goti grandi, in tutto marche 75. *Item*, tapedi 9 emischisadi, et uno grandio da taola, et tre peze bellissime di zambeloto, braza 36 e mezo l'una, rosse paonazze; il qual presente tutto costa ducati . . .

Veneno in Colegio li zentilhomoni stati a la custodia di le porte di Padoa, zoè parte di loro, perchè erano amalati, et exposeno esser stati mexi 21 a ditta custodia con il salario di ducati 10 al mexe, et portono la letera di rectori dil ben servir loro. Il Principe li carezoe, dicendo fosseno ben venuti etc.

L'à nome di quali e dove erano, sarà qui avanti posto, et quelli à un 0 davanti, non veneno in Colegio.

113 Sier Vetur Pixani qu. sier Zorzi, a la porta dil Portello.

Sier Zuan Dolfin qu. sier Hironimo, a la porta di Pontecorbo.

Sier Bernardin da Canal qu. sier Anzolo	} a Santa Croze
Sier Jacomo Condolmer qu. sier Zuan Francesco	

Sier Vicenzo Zen qu. sier Tomà el cavalier, al bastion di la Saracinesca.

Sier Francesco Corner qu. sier Zorzi	} a la porta di la Savonaruaola
Sier Zuan Boldù qu. sier Antonio el cavalier	

Sier Stefano Michiel qu. sier Zuane, al bastion de l'Impossibile.

Sier Biaxio Querini di sier Zuan Nadal, a la porta di Coalonga (*manca il resto*).

Di Chioza, di sier Pangrati Zustinian postè, fo letere. Dil zonzer li di Obizo da Ravena con fanti . . . fati in Romagna, li quali fono mandati a la volta di . . . *Etiam* il fiol di Gnagni Pincon zonse per avanti con fanti . . . i qual fono mandati a Treviso per impir la sò compagnia.

Da poi disnar, fo Colegio, dil Serenissimo, Consieri et Savii in materia di Provedadori dil sal per cose de sali.

Vene l'orator di Ferrara a vespero, et monstrò *letere dil suo Ducha, di eri, hore 5 di note.* Co-

me certissimo il Vicerè col campo di spagnoli erano a Butri castello di là di Bologna a la volta di Romagna per ritornar in reame; sichè non sono per passar Po più.

Di campo, non fo alcuna letera, che si desiderava averla.

A dì 7 Domenega. La matina, reduto Colegio, non fo nulla da novo. Hironimo cavalero era stà fino a Hostia et non havia visto nulla; passò ben di qua quelli cavalli de spagnoli lizieri per far danni, ma nulla è con effecto.

Di Mantoa, di Hironimo Cavechia fo letere drizzate a . . . di 5. Come il Vicerè scrisse a Rozon li facesse preparar burchii per far il ponte; hora mo li ha scritto non fazi altro perchè non li achade, et voleno andar in reame; et esser zonto il Tricaricho orator dil Papa a Bologna, qual va dal Cristianissimo re con l'acordo fato.

Da poi disnar, fo Gran Consejo. Vene il Principe 113* portato *ut supra*, et fo leto per Zuan Batista di Adriani secretario dil Consejo di X tre parte prese nel Consejo di X, l'una 1506, 18 Marzo, zerea quelli portano arme e siano sacramentadi li Officiali di note e Cai di sestier per il Serenissimo una volta al mese; l'altra del 1507, a di 21 Avosto, zereha restituir le arme. *Item*, un'altra dil 1451 a di 21 April, che non si meta più di una balota, soto pena di esserli tajà la man etc.

Fo dato sacramento per li Cai di X al Serenissimo Principe nostro, justa le leze, di observar la soa Promission, el qual si cavò la bareta e zurò. *Etiam* quando si andò a capello, tutti andono a zurar sul messal de mantener el Capitolar.

Poi fo lecto et posto per li Consieri una parte presa nel Consejo di Pregadi a di 27 dil passato, zereha non far più salvaconduti per Pregadi, ma chi li vol vadino a li Sora consoli *ut in ea*. Ave 387, 154, 7; la copia di la qual sarà posta qui avanti.

Fu poi posto la parte di le suspension, che messeno sier Sebastian Querini e sier Lunardo Zantani cai di LX, presa a di 27 dil passato in Pregadi e suspesa per sier Francesco Bolani l'avogador, qual, visto la leze dil Consejo di X dil 1464 a di 11 Lujo che non vuol alcun possi suspender le parte prese, si tolse zoso, et li Consieri messeno la dita parte, la qual sarà notada qui avanti. Fu optima parte et fu presa. Ave 18 non sincere, 94 di no, 1098 di sì.

Fo fato ozi Luogotenente in la Patria di Friul, e tolti tre zoveni rimasti questo anno di Pregadi. Et subito sier Zuan Emo di sier Zorzi andò a oferir, oltra ducati 1500 prestati ultimamente, al presente